

古典小說 佳作 溫仲斌

個人簡介：臺灣師範大學國文學系碩士班二年級

香港僑生，曾獲第36屆中興湖文學獎全國徵文比賽古典文學類第二名、
第34、37屆中興湖文學獎全國徵文比賽古典文學類第三名。

憶西湖舊遊

堤柳毵毵綠九迴，雲陰巘疊隱樓臺。扁舟一往煙深處，遍載湖山人夢來。

登山同友人

聯袂登臨指顧間，風林簌簌鳥關關。炎陬此盡尤宜望，衆嶺南來不肯還。亂島分明成弈局，大鵬畢竟落塵寰。先生縱有歸休志，欲就何方買好山？

去國

天荒地變吾何處？日暮天涯動別愁。風月依然當未亂，海山從此不宜秋。孤身去國慚無用，一念逃虛可自由。再見夢中應有恨，強揩淚眼對雲樓。

中共通過所謂港版國安法者時風雨如晦雷鳴兢兢數日不止

風壓重雲欲陷城，雷闐晝晦萬人驚。哭歌何用天難補，我汝偕亡事已成。國有王侯唯喋血，世無湯武莫言兵。有生如此復何憾，同看陸沈滄海傾。

雨後過中文大學

世事如斯那忍論，諸生曾此賭乾坤。瀟瀟雨洗硝煙盡，可有當時苦戰痕？

秋夜聽雨

暗雨鳴窗儻可收，據牀瞠目要勝憂。雲埋肯放清時月，蟲語猶爭未老秋。一室欲沈小天地，兩年多難此淹留。橫流滄海風吹髮，悵望書生愧遠遊。

日月潭

連朝冷雨喜開晴，王粲登樓眼倍明。四立雲山護潭綠，雙懸日月入舟輕。得秋先覺魚蝦美，近岸逾高墟市聲。蓬島猶存天未醉，暫時相賞寄浮生。

登高

廣武傷時淚，登高一悵然。江湖容獨往，花月不新鮮。絕頂塵難到，四圍山可憐。大鵬從此起，容易去無前。

江海二首

江海經年別，悠悠夢漸希。墜歡寧弗憶，縈抱又疑非。彼既留無意，吾何悵忘歸？詩成翻積思，還寢夢微微。

一別無消息，春心只自孤。豈真成永訣？本意更長途。吾苟能情絕，何為人夢呼？
低迴空有恨，之子亦知無？